


Cumegn Albula/Alvra



**Lescha davart igl urden da sepultura e da
santieri digl cumegn Albula/Alvra
(Lescha da sepultura; LdS)**

Approvada dallas radunanza communal digls 15.09.2017
e messa an vigour antras la suprastanza
communal per igls 01.01.2018

Lescha davart igl urden da sepultura e da santieri digl cumegn Albula/Alvra (Lescha da sepultura; LdS)

Sen basa digl art. 12 alinea 2 dalla lescha davart igls fatgs da sanadad digl cantun Grischun (DR 500.000), ò la radunanza communal digl cumegn Albula/Alvra decida:

I. Determinaziuns generalas

Art. 1 Intent

Chesta lescha regla igl urden da sepultura e da santieri sen igl territori digl cumegn Albula/Alvra.

Art. 2 Santieris aint igl cumegn

Per santieris publics digl cumegn valan igls santieris ad Alvagni vischnanca, Bogn d'Alvagni, Alvaschagn, Brienz/Brinzauls, Casti, Mon, Stierva e Surava.

Art. 3 Furmas da fossa e da sepultura

Sen igls santieris publics è lubeida mintga furma da fossa e da sepultura tenor art. 10, schinavant tgi las relaziuns legalas, da construcziun e geologicas permettàn. I exista nign dretg sen ena furma da fossa u da sepultura tgi è betg preveida segl santieri correspondent.

Art. 4 Obligaziun d'annunztga

¹ Mintga mortori u mintga cattada d'ena bara sen igl territori communal, ò da neir annunztgeida all'administraziun communal an terma da 48 ouras.

² Ulteriouramaintg sa drezza l'obligaziun d'annunztga all'ordinaziun davart igl stadi civil.

II. Organs e cumpetenzas

Art. 5 Suprastanza communal

¹ La survigilaziun suprema digls fatgs da sepultura e da santieri surstat alla supranza communal. L'incumbenza dalla supranza communal cumpeggia an spezial igls suandonts pensums:

- a. decider davart la planisaziun e furmaziun digls santieris;
- b. restranscher la tscherna libra digl santieri;
- c. trer ena decisiun davart multas ed ordinaziun da maseiras ramplazzontas.

² Schi ena cumpetenza da decisiun u ena incumbenza n'è betg assigneida, decida la supranza communal davart dall'assegnaziun.

Art. 6 Direcziun da gestiun

Alla direcziun da gestiun surstattan an spezial las suandontas incumbenzas:

- a. decider davart la sepultura da defuncts sainza aveir domicil igl davos onns aint igl cumegn;
- b. decider davart en tractamaint equal da persungas mortas tgi on domiciliia durant blers onns aint igl cumegn, pero betg scu lour davos domicil, cun talas persungas tgi on gia lour davos domicil aint igl cumegn;
- c. decider davart dumondas per la prolungaziun digl termin pertutgont ena sepultura da fossa u cremaziun;
- d. disponer ed organisar la revocaziun e rumageda dallas fossas;
- e. garanteir igl menaschi ed igl mantignamaint digls santieris an collaboraziun cugl menaschi tecnic;
- f. decider pertutgont l'obligaziun da mantignamaint tralaschea;
- g. decider davart l'adattaziun armonica da monumaints ed ornamaints da fossa;
- h. lubeir occurrenz.

Art. 7 Administraziun

All'administraziun surstattan an spezial las suandontas incumbenzas:

- a. piglier ancunter las annunztgas da mortoris;
- b. ordinar las maseiras necessarias per l'organisaziun ed excuziun dalla sepultura;
- c. facturaziun;
- d. manar en register dallas fossas;
- e. eriger en plan digl santieri.

Art. 8 Menaschi tecnic

Agli menaschi tecnic surstattan an spezial las suandontas incumbensas:

- a. mantignamaint general digls santieris;
- b. survigilaziun generala digls santieris e la garanzeia da pôss ed urden;
- c. survigilaziun durant la sepultura;
- d. tgavar e curveir la fossa an convignientscha cun igls survivors;
- e. survigilar l'erecziun digls monumaints da fossa.

III. Urden da sepultura

Art. 9 Sepulturas

¹ Sen igls santieris publics vignan sutaros defuncts tgi vevan lour davos domicil aint igl cumegn u tgi èn nias cattos morts segl territori communal.

² A nign dastga neir refuso ena degna sepultura sen en santieri public perveia d'aspects da cardientscha u per oters muteivs.

³ Persungas, tgi on betg gia domicil aint igl cumegn ed èn betg mortas u neidas cattedas mortas aint igl cumegn, dastgan neir sutaradas sen igls santieris publics angal cun lubientscha digl cumegn.

Art. 10 Preparaziun dalla sepultura

¹ Igls confamigliars on da procurar tg'igls defuncts vignan mess aint igl vaschel e transferias conform agli urden. Igls costs persiva, inclus eventuals costs da cremaziun, on da neir surpiglias digls confamigliars. Schi mantgan confamigliars, alloura surpeglia igl cumegn chesta incumbensa.

² Igl cumegn peglia tottas disposiziuns necessarias per la sepultura. Igls defuncts on da neir transferias per regla ainten en salv da bara previa persiva. Schinavant tgi existan nigns muteivs dalla pulizeia sanitaria, pò la bara restar aint igl salv da bara anfignen tar la sepultura.

³ La sepultura u cremaziun dastga neir exequeida pir siva la constataziun dalla mort antras ena media u en medi cun l'admissiun da practitgier la professsiun an Svizra. Igl attest da mort medicinal vala scu lubientscha per la sepultura. Resalvos restan cass d'ena sepultura urgenta per muteivs dalla pulizeia sanitaria.

Art. 11 Execuziun dalla sepultura

Igl cumegn exequescha la sepultura risguardond commensuradamaintg igls giavei-schs dalla persunga morta, an cunvignientscha cun igls confamigliars ed igls cumegns-baselgia responsabels. L'organisaziun dalla celebraziun religiousa surstat agls confamigliars.

Art. 12 Li da sepultura

La tscherna digl santieri public è da prancepi libra. Per muteivs relevants, pò igl cumegn restranscher la tscherna libra.

Art. 13 Taimps da sepultura

Las dumengias ed igls firos scu er da festas ecclesiasticas, on li per regola nignas sepulturas.

IV. Urden da santieri

Art. 14 Pôss ed urden

Santieris èn lis da pôss per igls defuncts e lis da reflexiun. Visitaders scu er interpretas activas sen santieri, èn obliias da piglier risguard e chito commensuro. Igl è da risguardar las ordinaziuns dallas persungas responsablas.

Art. 15 Furmas da sepultura

Per la sepultura stattan a disposiziun:

- a. sepultura usitada ainten ena fossa da retschas;
- b. sepultura d'urna u tschendra ainten ena fossa da retschas;
- c. sepultura d'urna u tschendra ainten ena fossa da retschas existenta;
- d. sepultura d'urna u tschendra ainten ena fossa d'urnas;
- e. sepultura d'urna u tschendra ainten ena fossa d'urna existenta;
- f. sepultura d'urna u tschendra ainten ena fossa comunabla.

Art. 16 Recepients da sepultura

¹ Igl ò da neir duvro vaschels da mort adattos per igl transport, per la deposiziun dalla bara e per la sepultura an fossa u cremaziun.

² Las urnas ston esser produtgeidas cun material decumponibel.

Art. 17 Equipamaint dallas fossas

¹ Fossas e reschlas da fossas dastgan neir erigeidas, midadas u allontanadas angal an cunvignientscha cugl cumegn.

² Fossas e ulteriours equipamaints da fossas, on da s'adattar armonicamaintg agl maletg cumplessiv digl santieri. Igls monumaints da fossa on d'effectuar en maletg simpel e degn; els duessan neir furmos cun tot chito an moda artisanala ed artistica.

³ Ainten en reglamaint regla igl cumegn an spezial las relaziuns da distanza, la quantad scu er la furmaziun e cumposiziun digl material digl equipamaint dallas fossas digl santieris publics.

Art. 18 Mantignamaint e tgira

¹ Igls confamigliars digls defuncts èn responsabels, da mantignair las fossas ed igls monumaints da fossa an en stadi cultivo.

² Schi l'obligaziun da mantignamaint vign tralascheda, ordinescha igl cumegn las maseiras necessarias a gravezza digl obliia per igl mantignamaint siva da dus admuni-ziuns invanas.

³ Schinavant tgi existan nigns obliias per igl mantignamaint, surpeglia igl cumegn igls costs per la tgira dalla fossa.

Art. 19 Pôss da fossa

¹ Igl pôss da fossa an tera u da sutaradas d'urna monta minimum 25 onns. L'exhumaziun avant la scadenza digl pôss da fossa sa drezza agl dretg cantunal.

² Per cass d'ena sepultura d'urna u da tschendra posterioura, vign igl pôss da fossa betg prolungo.

³ Las fossas vignan dissolveidas respectiv allontanadas antras igl cumegn igl pi bod 25 onns siva da lour erecziun. Schi existan muteivs relevants per ena dissoluziun prematurada, pò igl cumegn lubeir tala.

Art. 20 Rumageda dallas fossas

¹ A taimp inditgia ordinescha igl cumegn la dissoluziun e rumageda dallas fossas. Chella ordinaziun vign annunztgeida an scretg minimum seis meis avant igl termin da rumageda.

² Siva dalla scadenza digl termin da rumageda pò tala neir surdada an incumbensa antras igl cumegn, ed a gravezza digls confamigliars.

³ Igl cumegn pò disponer d'equipamaints e monumaints da fossa tgi èn betg nias allontanos segl termin.

⁴ Cun ena dumonda mutivada, e siva dalla scadenza da taimp da 25 onns, pò neir inoltrada la rumageda dalla fossa.

Art. 21 Register da fossas e plan da santieri

¹ Igl cumegn magna per mintga santieri en register dallas fossas tgi cuntigna igl numer dalla fossa, nom e prenom digl defunct ed igl onn da naschientscha e mort.

² La furmaziun digls santieris vign fixada aint igls plans da santieri existents.

Art. 22 Responsablada

Igl cumegn surpeglia nigna responsablada per donns, tgi vignan caschunos ve da fossas, monumaints da fossa, reschlas, implantaziuns e sumigliaint antras decadenza, influenzas dall'ora u antras acts illegals da terzas persungas. An spezial surpeglia igl cumegn nigna responsablada per donns, caschunos da fossas vaschignas tralaschedas.

V. Finanzas

Art. 23 Tariffas

Las tariffas per la sepultura sa drezzan tenor igl reglamaint davart la lescha da sepultura e da santieri digl cumegn Albula/Alvra.

Art. 24 Costs da menaschi, mantignamaint ed investiziun

Igl cumegn surpeglia igls costs da menaschi, igls costs da mantignamaint ordinaris e las expensas per la renovaziun u amplificaziun digls santieris publics.

VI. Execuziun

Art. 25 Decret dallas determinaziuns d'execuziun

La suprestanza communal relascha en reglamaint tgi cuntigna las determinaziuns d'execuziun e detagls necessaris pertutgont la lescha preschainta.

VII. Determinaziuns penalas e meds legals

Art. 26 Determinaziuns penalas e maseiras substitutivas

¹ Chel tgi cunterfò sapientivmaintg u per negligentscha allas determinaziuns da chesta lescha u a decrets ed ordinaziuns tgi sa basan a tala, vign punia cun ena multa d'anfignen 5'000.00 francs. Per cass pi levs pò neir do an pe d'ena multa en'admuniziun u neir renunztgia ad en castei.

² Igl stadi legal ò da neir restabilia ainfer en termin commensuro. Per cass d'en restabilimaint tralaschea u insuffizaint ordinescha igl cumegn maseiras substitutivas a gravizza dalla persunga responsabla.

Art. 27 Recurs

¹ Anvers tottas disposiziuns ins pò recorrer an terma da 30 deis tar la suprestanza communal. Igl recurs ò da cuntigneir ena proposta, igls fatgs cun igls mussamaints scu er ena mutivaziun.

² Decisiuns dalla suprestanza communal pon neir contestadas ainfer 30 deis tar la dertgira administrativa.

VIII. Determinaziuns finalas

Art. 28 Vigour

¹ La lescha preschainta è sottomessa agl referendum facultativ.

² La suprestanza fixescha l'antrada an vigour da chesta lescha.


³ Cun l'antrada an vigour da chesta lescha vignan dissolveidas tot las determinaziuns dad oters decrets tgi stattan an cuntradicziun cun chesta lescha.

Igl mastral



Daniel Albertin

Igl scrivant da cumegn



Maurus Engler